

Chantun cunter numers minimalis

Rathgeb ha manzunà ils numers minimalis da cas trattats

DA FLURIN ANDRY / ANR

■ Pella terza jada visitescha cusglier guvernativ Christian Rathgeb ils desch ospitals regiunals in Grischun. Quistas visitas chi dūran fin quista stà han cumanzà a Scuol. Per chürrar ils contacts culs responsabels dals ospitals regiunals in Grischun visitescha il directur da sandà chantunal Christian Rathgeb pella terza jada tuot ils ospitals regiunals grischuns. El vain accumpagnà da seis collavuraturs ils plü strets, Nicola Kull, secretaria dal departamaint, e Rudolf Leuthold chi maina l'Uffizi chantunal da sandà. La prüma visita hana fat in marcurdi a l'ospital a Scuol. Quist ospital regional fa part dal Center da sandà Engiadina Bassa (CSEB). Il directur da quel es il meidi Joachim Koppenberg. Preschaints d'airan eir Victor Peer, il president dal cussagl da fundaziun e'l delegà da la suprastanza dal CSEB Philipp Gunzinger. A chaschun da la conferenza da pressa cha la delegaziun ha dat davo lur visita a l'ospital ha nomnà Rathgeb il CSEB la cumprova chi saja pussibel da procurar da maniera economica pel provedi-



Joachim Koppenberg e Philipp Gunzinger (da sch.) ingrazchan a Christian Rathgeb pel sustegn da vart dal chantun pels ospitals regiunals.

FOTO F. ANDRY

maint da sandà eir in regiuns periferas. El ha manzunà l'intenziun da l'Uffizi federal da sandà (UFS) d'introdüer in tuot la Svizra numers minimalis da cas trattats i'ls ospitals: «Cunquai

cha quist intent significhess la fin da nos provedimaint da sandà decentral ans defendaina cunter quai», ha dit Rathgeb, «no fa in quai eir insembl pel curs directuors da sandà dad oters chantuns

muntagiards cun üna situaziun sumgliainta a nossa.» La perioda da consultaziun davart l'intent da l'UFS cumainza in avrigl.

> PAGINA 7

ENGIADINA

GIEVIGIA, IL 1. DA FAVRER 2018

7


CSEB exemplaric eir pro la digitalisaziun

Christian Rathgeb ha visità l'ospital a Scuol

■ (anr/fa) Fin d'instà visitescha üna delegaziun manada da cusglier guvernativ Christian Rathgeb tuot ils desch ospitals regiunals in Grischun. Las visitas servan al discussiunar la situaziun dals singuls ospitals. «Sco pitschen ospital regional eschena grats d'avair il sustegn dal chantun ed eir da pudair bivgnantar regularmaing al directur da sandà chantunal qua pro no», ha dit in marcurdi il meidi Joachim Koppenberg chi d'es directur da l'ospital a Scuol sco eir manader dal Center da Sandà d'Engiadina Bassa (CSEB). Davo ils ons 2014 e 2016 visitescha fin in avuost il cusglier guvernativ Christian Rathgeb darcheu tuot ils desch ospitals regiunals dal Grischun. Eir ingon vain el darcheu accumpagnà da seis collavuraturs ils plü strets, Nicola Kull, secretaria dal departamaint, e Rudolf Leuthold chi maina l'Uffizi chantunal da sandà. Preschaints a la conferenza da pressa d'airan eir Philipp Gunzinger, delegà da la suprastanza dal center da sandà e Victor Peer chi presidescha il cussagl da fundaziun da quel.

Da naschentscha fin la chiüra in età avanzada

Rathgeb ha accentuà cha'l CSEB cun seis partenaris, ospital, bogin, spitex e chiüra, chi tiran a nüz optimalmaing las sinergias, saja amo adüna «ün model per tuot las regiuns da sandà grischunas per pudair garantir da maniera economica il provedimaint da sandà decentral in Grischun». Sco bun exaimpel ha'l manzunà las novas pussibilitats digitalas, sco la telemedicina, chi vegnan utilisadas a l'ospital. Ch'uschea possa gnir chürrà il paziaint cullas metodas las plü novas eir il-la periferia, ha constatà Rathgeb. Positi-



Victor Peer, Joachim Koppenberg, Christian Rathgeb, Nicola Kull, Rudolf Leuthold e Philipp Gunzinger davant l'ospital regional a Scuol.

FOTO F. ANDRY

va es, sco ch'el ha continuà, eir la promozion dal turissem da sandà chi exista illa regiun grazcha a las sportas turisticas chi attiran giasts chi vöglan cumbinar las vacanzas cun far eir alch per lur sandà. Il cusglier guvernativ ha manzunà eir l'avantag economic cha'l CSEB sco plü grond patrun da lavur da la regiun significh. «Ed uossa vain l'Uffizi da sandà federal e vuol introdüer in Svizra a partir dal 2019 numers minimalis da cas trattats

i'ls ospitals», ha'l manzunà, «quai chi füss desasturs per nos provedimaint da sandà decentral.»

«Daplüs cas nu significhan daplü qualità»

Rudolf Leuthold ha declerà cha la qualità dals ospitals in Svizra gnia controllada regularmaing e'ls resultats publichats da la Società nazionala pella qualità in ospitals e dmuras ANQ: «Quels resultats

muossan cha la qualità i'ls ospitals grischuns es illa media svizra o megliora.» Chi nu saja vaira cha la qualità saja main buna in ospitals pitschens, ha dit Rathgeb, «introdüer numers minimalis da cas trattats es plürost üna voluntà politica a favur dals grands ospitals illas citads.» Il meidi Koppenberg ha dit cha la pretaisa cha cas trattats procuran per daplü qualità stetta sün chommas fich falombras: «Eir schi's fa alch plü d'innar as poja far

buna lavur», ha'l declerà ed agiunt cha cul numer minimal da cas trattats exista eir il privel chi gnia operà plü suvent, «eir cur chi nu fess propcha dabsögn.» Philipp Gunzinger ha infuormà chi saja stat pussibel i'ls ultims 12 ons, eir grazcha al sustegn chantunal, «da muosar cun l'exaimpel CSEB chi d'es pussibel da garantir uschea il provedimaint da sandà da maniera economica eir illas regiuns periferas.»

L'ultima visita es in avuost a Samedan

Als 31 schner ha cumanzà il cusglier guvernativ Christian Rathgeb sias visitas dals ospitals regiunals. Davo avair visità a Scuol l'ospital d'Engiadina Bassa sun el e la delegaziun stats quel di plü tard eir amo in visita illa Clinica Gut a San Murezzan. Als 2 favrer fa el la visita a l'ospital San Sisto i'l Puschlav. Als 9 favrer es Rathgeb in visita i'l ospital a Tusan ed als 16 favrer fa'l la visita a Glion a l'ospital da la Surselva. Als 23 favrer visitescha il cusglier guvernativ a Promontogno l'ospital da la Bergaglia. Als 2 marz fa'l lura la visita a Sta. Maria a l'ospital da la Val Müstair. Als 13 avrigl visitescha Rathgeb l'ospital da Schiers ed als 25 avrigl l'ospital da Tavo. Als 27 avrigl fa il cusglier guvernativ a Savognin la visita a l'ospital dal Surses. Ed als 17 avuost finischa'l sias visitas dals desch ospitals regiunals grischuns cun visitar a Samedan l'ospital d'Engiadina'Ota.